

周
易
正
解

周易正解卷二

坤

三三三

坤上

坤之一。乾之一。中分而爲兩也。故坤非乾敵。是效乾之能者也。元炁之始陽而已。陽動陰應。如形之徵影。影之逐形。一陽動卽一陰應。奇生卽偶成。六奇卽六偶。象數之自然也。陽惟一。故曰健。陰兩之。故曰順。一者主始。故曰知。兩者承行。故曰能。一故曰易。順故曰簡。有陽卽有陰。故易首乾坤也。或曰靜則一。動則兩。陽體動而反爲奇。陰體靜而反爲偶。何也。曰虛故能靜。實故能動。兩者虛之象。一者實之象。實故剛。虛故

柔剛常一。柔常兩陰。非自爲陰也。陽消而爲陰也。故其體虛而不足。其性不能自動而常躁。隨陽而動。待施而受。其象中開虛而不滿。卽陽氣之闕陷者耳。以象地何也。曰虛受陽施。凝結而成塊也。元氣真清爲陽。爲天。其渣滓卽爲陰。爲地。故陰虛而受實。靜而含動。柔而承剛。陽之變也。陽實而主施。動而居靜。剛而乘柔也。地非自爲地。陰非自爲靜。虛順陽而已。故曰坤者順也。聖人所以取象。發順承之義也。其卦六畫皆偶。有順象。內外重偶。有厚象。內虛。有中象。有含象。有通象。兩兩相比。有行象。有朋象。彬彬適均。有文象。

有美象六偶十二有方象有大象秩秩不亂有理象
左右分布有體象有業象爻辭文言因象繫辭也以
地類推之在人則爲母爲臣爲妻爲卑屬于物爲雌
于事爲靜于學爲能于時爲夜爲秋冬于類爲小人
皆坤象也然易象變動未可執一非謂君父槩不得
占坤臣妾槩不得占乾也非謂乾但可知不可行坤
但可能不可知也非謂乾六爻无小人坤六爻无君
子也六二之不習亦是生知安行之聖何必坤定主
賢六五之黃中亦是恭謙溫文之主何必臣定爲坤
聖人隨宜設象非拘拘然也弑逆之凶發于初而龍

戰之禍形于上。何嘗一一皆聖賢事。然則以象地配乾首諸卦而稱至德何也。蓋陰雖反陽而坤陰非駁雜之陰。天下之惡始于不純。坤體乾之純。得元陽初分之炁。未遠于太始。故稱簡能。體乾生物。象地而爲至德也。初六地下。六二地上。六三地生物。六四長物。六五成物。上六藏物。以人論。初爲幼。二爲處。三爲將出。四爲出。五爲臣。六爲老休。若夫變而通之。无入无坤。无事无坤。无物无坤。爻可爲人。爻可爲事。爻可爲物。因乎時與位與人而已。程正叔以坤六五爲尊位。不可以人臣當之。夫五之爲尊位也。象耳。非五本名。

君也。坤之爲人臣亦象耳。非坤本名臣也。夫子文言以坤爲臣道。妻道謂臣與妻當效坤之柔順。非謂臣與妻定居某一爻也。君有五。臣亦有五。夫有五。妻亦有五。无人无五。无物无五。无事无五。未可拘拘論也。○有乾自有坤。所謂一陰一陽之謂道。故首易而同體。乾初九陽始生。坤初六陰始生。九二乾德之盛。六二坤德之盛。九三將出而憂惕。六三將出而含章。九四初出遇重剛而或。六四初出遇重陰而括囊。九五居尊而利見。六五正位而元吉。上九陽亢而悔。上六陰極而戰。乾中四爻皆有動象。坤中四爻皆有靜象。

此乾坤合德。坤所以承乾也。故天地非兩體。乾坤非二物。陰陽非二道。

坤如形體。乾如心志。坤效乾如形體。效心志。志帥氣。充不知其然而然。故謂之順。乾知坤能。乾易坤簡。乾始坤終。坤之元亨利貞。卽乾之元亨利貞。坤有過差。以其喪乾也。初之積殃。是坤之始侵乾。上之疑戰。是坤之終背乾。故坤不可不順。以不得不順也。不順卽无坤。

乾者天道。坤者聖人。所以法天。坤以君言。是周之成康。漢之文景。乾以臣言。是商之伊尹。漢之霍光。乾以

賢言是顏孟坤以聖言是湯武

坤言光言文章言美皆陰麗于陽而生也大虛无形
凝爲人物則靈言語知覺運動陽麗乎陰也形陰也
虛靈陽也地形也生物則虛靈之用也陽有美而无
形不得地无所施坤順之耳兩物順則成文亂則不
文一物獨亦不成文故乾純一不言美坤順陽乃言
章美人道篤實自光闇然自章懦弱自文順之生美
也大抵天道一氣玄同地乃有山川草木界障區別
凡言文章光美地也莫非天也故乾坤一體

坤元亨利牝馬之貞君子有攸往先迷後得主。句利西

南得朋東北喪朋安貞吉

坤者伏羲所畫六偶卦之名伏羲始畫一奇一偶大極兩儀呈而三才立矣故三奇爲乾以象天三奇成則三偶應故三偶爲坤以象地上又錯以坤遂總名曰坤坤者厚重之名乃其所以爲順者也未可以順釋坤也元亨以下文王之彖辭坤與乾同體坤之元亨卽乾之元亨惟乾利貞而坤則利牝馬之貞也馬健獸本乾象而爲人乘載健之順也牝陰象陽之偶也龍陰物順而能健所以象乾馬陽物健而能順所以象坤龍飛而馬行龍能變化而馬不能也坤以從

陽承行爲貞。如爲龍爲牡馬之貞則不利矣。蓋貞者
事之幹。四德惟貞有專成之意。坤道无成不得自爲
貞而以從陽得正爲貞。如牝馬之從牡者然。故下文
言利西南。西南陰位。卽牝馬之義。陰非自爲陰。偶于
陽而爲陰。无陽則靜而躁。有求而好動。陽資始无爲。
待陰而行。故陽爲知而坤爲行。馬行物也。君子攸往
往行也行從陽也。先倡也。後隨也。陽生陰。无陽則无
陰。故倡則迷。隨則得主。主謂陽也。利西南得朋者。西
南成物之鄉。坤居焉。故爲得朋。朋者偶象。東北物始
生之鄉。坎艮震諸陽居焉。陰進陵陽。偶變爲奇。故喪

朋得朋者安其處而爲後。故利喪朋者越分而爭先。故迷守坤之分。勿先而後。隨而不倡。則安正而得吉慶矣。或讀元亨利爲句。牽強難從。

坤利貞與乾異。而元亨與乾同。何也。元一而已。亨卽元氣之通暢也。春夏之間。天地交暢。二氣忻合。故乾坤同利貞者。性情也。秋冬斂藏。各正保合。則天氣升而地氣降。故利貞異。乾之利貞專主成功。坤之利貞承乾代終。如牝馬從牡行耳。乾德在元。坤德在貞。君道體元首。出庶物。臣道安貞行。地无疆也。

天下之理。先知後行。則不迷。乾知未始。坤行焉往。故

曰先迷後得主。知止而後有定。有定則得主不迷。
此文王以義畫自占也。以龍事紂。以其身爲馬。且不
敢爲牡。柔恭之至。君子自寓也。攸往服事也。先迷後
得主。遭姜里之禍。獲釋而戴君罪已也。岐豐化行。至
于江漢西南也。豫青兗冀東北也。西南之民心化而
東北之君心未格。安貞以守臣節。爲吉而已。此文王
所以服事止敬。立坤道之準也。大抵聖人言易卽是
學易。文王演易卽是事殷之本心。孔子贊易卽是自
脩之實事。卜筮云乎哉。

坤道主于貞。其常也。然苟非牝馬之貞。而用乾剛之

貞則失其所以爲坤。順如牝馬而无其貞則又爲陰邪之私而失其所以爲順。此彖辭本意。夫子于彖言厚德于爻言含章括囊于文言申初六之戒皆所以成順之美。全坤之貞。此坤卦之大占也。

彖曰至哉坤元萬物資生乃順承天

乾言大坤不言大者天包地也言至者乾始坤生乾大而坤與之齊也坤元者非坤別有元元一而已天之始生卽地生之始也生者形也乾施氣坤承氣而生形乃所以順承天也

坤厚載物德合无疆含弘光大品物咸亨

坤以厚德載物。配合乾太无有疆界。其承而受之也。含藏弘廓。所謂靜翕也。其布而散之也。光顯博。大所謂動闢也。普天之下。品物无不亨通于地上。所以行乾之亨也。

順卽彖辭牝馬意。厚卽貞意。順者坤之道。厚者順之貞。兼順與貞。乃盡坤德。

牝馬地類。行地无疆。柔順利貞。君子攸行。先迷失道。後順得常。西南得朋。乃與類行。東北喪朋。乃終有慶。安貞之吉。應地无疆。

承上言坤元亨。與乾合德者无他。惟其柔順從乾而

已蓋乾行之健終古不息使以健承健則其道逆而
界障生又使順而少有勉強迎合不出于性情之真
以彼乾行无息勉而爲順有時而輟斯有疆之行矣
何利貞之有故利牝馬之貞牝馬陰物其象爲地類
健行從牡求不辭界障險阻惟其行而已矣行无疆
而後爲牝馬牝馬行而後能合乾行之无息此坤所
以爲柔順得利貞者也君子居坤之位體坤之德行
牝馬之行利在得主不利爲主无因而倡是先之也
先必失主而迷順應而從是後之也後則得主而常
東南西北皆乾所統執坤之行者不敢兼乾之事惟

西南爲坤致養之位。當與其朋偕。素位而行。不可先也。至東北爲帝所從出之鄉。往則將喪其偶。敢不後乎。然與類行。雖得朋而无主。必迷之道也。得主雖无朋而後順。得常之道也。蓋乾有必施。坤有必承。陰陽合而終有慶。所謂牝馬之行。安貞之吉。應地道之无疆。斯君子體坤之攸行矣。坤道主行。故以行言。人心神明爲主。耳目從心。是謂得常。耳目自主。先迷之道也。耳目各守其官。是謂西南得朋。耳目奪心。志是東北喪朋。然耳目徒守形骸。雖類行无主而自先必迷。耳目隨心志。雖喪朋而得主則不失常。

易原無所謂先天也。先天卦圖自後世始。大子說卦
帝出乎震一章。乃八卦之定位。故坤利西南。以坤位
本西南也。坎艮震諸陽皆在東北。而世儒疑東南爲
陽。西北爲陰。夫陰陽兩在。互藏其宅。如南本陽。明自
北向之。則生明。明自北見也。北本陰。暗自南視之。則
生暗。暗自南見也。故火雖外明而中暗。水雖外暗而
中明。陰往居南則爲離。陽來居北則爲坎。南雖陽而
離則女。北雖陰而坎則男。天地無陰之陽。無陽
之陰。此不測之神也。況陽生于子。東北物生之方。故
左爲陽。陰生于未。西南成物之方。故右爲陰。其理昭

然何得以西南爲陽乎

象曰地勢坤君子以厚德載物

天象以行動也地象以勢靜也坤者厚重之名故彖曰坤厚載物坤卽厚也地厚不可測其幅隕之太根底之深靜觀其勢坤然故卦積六偶而成象其厚也君子靜觀地勢反占諸身器宇不敦篤則輕浮放浪不足以凝天下之理心志不端慤則狂騁躁率不足以荷天下之事用坤之勢培養厚德以爲載物之地斯善占坤矣

順而不厚其順易邪以厚言坤地道主貞之義順者

坤之所以承乾厚者地之所以載物君子順以承尊而厚以立德基厚然後行順不厚而順妾婦之順耳將有匿情爲惡如履霜之漸者故文言申戒之體孔子之忠信行文王之懿恭二聖之易皆自占也

按坤字从土从申申土位故坤以厚重爲義大象以厚釋坤猶乾大象以強釋乾世儒訓坤爲順文義不類然則象宜云以順德承天乃可相承之訛自王輔嗣已然矣

初六履霜堅冰至

初六者指卦下初偶也卦成于三數起于一二爲陽

始故奇爲陽奇生偶偶兩奇三偶成六故陰爲六而
上下兩卦適成六位陰終于六故稱六也霜者寒氣
所凝堅冰者寒凝之極皆陰象也履足踐也乾元始
分一陽生卽一陰應乾純陽則坤純陰乾陽始于初
九則坤六陰亦自初始矣以其在下故象履以其初
陰故象霜霜者堅冰之將至一陰者六陰之漸積也
造化生氣唯陽而已陽消則生陰聖人好生與天地
同故易貴陽而賤陰于陰始生致警戒之辭

乾之初九復也潛龍勿用亦閉關不行之義坤之初
六姤也履霜堅冰亦女壯勿取之義

象曰履霜堅冰陰始凝也馴致其道至堅冰也

此孔子釋爻象之辭古本在六爻後王輔嗣註易移附各爻便觀省也後倣此馴者順而不察之意易彰往察來是謂逆數往而不察是順之耳忽不覺其來矣

六二直方大不習无不利

坤體柔順无雜二以柔居中當地之位故坤德莫盛于二是地之上也直順遂意有施卽受有受卽生陽氣一到更无壅閼何直如之方周正也洪纖高下生長成就无有偏曲虧欠不得所者何方如之天之所

覆乾之所包可謂大矣。而能配合无疆。兼收并載。不爲限量。何大如之。以彼山川險夷萬方。物類榮枯萬變形。生資取萬品。乾皆无爲。而委成于坤。如此其紛且夥矣。使待習而後利。不已窮乎。二能以其直方大。承乾不宰。知則行之。始則終之。惟牝馬之貞。无疆之行而已。何事于習而後利。此所以爲順之至也。大抵陰邪生于造作。而坤真陰未離乎大始。睽阻生于剛愎。而坤柔順自應乎无疆。所以易簡合德而承天也。○坤德莫備于六二。以陰居陰得正中。是爲坤體。如乾有九五。九五天中。六二地中。六五者。坤之用爻也。

○坤惟順所以直方大直方大所以不習无不利不習无不利所以行地无疆而德合乾也故坤德極于順順者與乾一體非模擬之謂也孩提之童无不知愛知敬乾也能愛能敬坤也所以承乾也

初六有履霜之漸遇六二中正則變而爲无不利此以德消悔之象所謂吉凶以情遷憂悔吝者存乎介也學易者置而不講可乎他卦多倣此

象曰六二之動直以方也不習无不利地道光也

爻不言動但言直方大孔子以直方大不可見見于地之生物生物者地之動也動爲陽承天也不言大

者。直方卽太邪曲則小。地道光亦于直方見之。少有邪曲卽不光。明卽紛擾安排不勝困頓不習不可得。而安能无不利。故直方而簡能之事可大之業畢。直方者簡之謂也。

以動者尚其變。動卽變也。坤三偶二動則偶變爲奇。有直象。乾在坤中有內直外方之象。故夫子釋爻象言六二動則直以方不動則有方无直也。陽爲大。故曰大陰得陽。故曰不孤。坤爲文。故曰光。

枯寂之士以清靜爲直方大。索居離處省事寡營。謂之習靜。及遇盤錯一步不可行。其究昏瞶无聊。乃以

私智求濟。愈曖昧而失利矣。是未達于六二之動者。故曰率性之謂道。天下之言性故而已矣。故者以利爲本。如智者行所无事。則智大矣。又曰其爲氣也至大至剛。以直養而无害。則塞乎天地之間。君子思孟。子可謂深于易矣。

凡光明生于順直。曲房委蛇。則日中見斗。陽光蔽于陰邪也。日月五星列宿之光。麗于天。其精化爲山川草木土石飛走之形。蓋凡天之文。卽是地之理。地道承乾順行。普物无心。純陰之體。晶瑩透徹。陽明映虛。如水受月。鏡受影。故陰无光。乾陽之精爽。卽其光无。

美乾道之發生卽其美无文章。乾道之變化卽其文章。豈擅獨成之能。貪天爭功。分曹而治。然後謂之文章。光美也乎。故坤道順而已者也。

謙則光。篤實則充。充實則美。闇則章。此其幾有不知所以然而然者。惟善體坤者兼之。

乾之九二。卽是生知。坤之六二。卽是安行。三才之理會于人人。身卽地耳。能聽目能視。手能持足能行。遇親能愛。遇兄能敬。誰從學習。承乾而已。易簡而已。順而已。恆人不直方大。以私欲矯揉狹小。故習然後利。苟能擴而充之。不失赤子之心。便是牝馬之貞。故曰。

存心養性所以事天。事天者承乾之謂。

六三含章可貞。或從王事。无成有終。

六二之德盛矣。變而之三位不中正。居下之終。當外之交。陰靜而躁。以陰居陽。苟不晦養。非處坤之道。宜含藏章美。貞固勿自炫可耳。坤終有可貞之象。以陰居陽。或出而從王之事。无專成功。代其終而已。六三與乾九四位皆不正。皆有疑象。或者疑之也。從王事從乾也。當上之交。有從王之象。

坤三索得兌。兌爲口。有含象。三變成謙。從王卽謙之勞。有終卽謙之有終。光卽謙之尊而光。易象變動多。

類此

直方不習无不利之德不惟六二人所同有。皆如六二中正則无往不善。然氣稟有偏駁。習尚有移徙。遭逢有險厄。則直方不習之利。或失爲露才揚已。故聖人有三四之戒。所以善用其順而爲可貞也。

易中而已。凡爻三四不中。故三多凶。四多懼。六二中正。故直方。至于三四。不含括。則是不知易。不知介。不知占矣。順反成亂。利反成凶。將有如文言所戒者。他卦多倣此。

象曰。含章可貞。以時發也。或從王事。知光大也。

有章而含之。非秘而不發也。可貞則貞。發必以時。或從王事。是以坤作承乾知。自光顯而博大也。

乾道至健。欲順而合之難。故順未易能也。坤道至順。欲含而貞之亦難。故貞亦未易能也。順而貞。惟厚德載物如地者能之。如是乃可无堅冰之慮。免龍戰之凶。

六四。括囊。无咎。无譽。

三將出而未出。四則爲外矣。重陰始交。時運方塞。四陰柔不中。身旣當局。則宜含章自守。如囊之括結其口。則可以免輕發之咎。而又不可享恬退之名。蓋括

囊使人覺而稱之。非真括囊者。終未免于害。无咎无譽。所謂順而不失其貞也。坤一索得巽。爲繩有括結囊口之象。坤虛有囊象。

君子學易玩占。處无道之世。遇无道之人。當難處之事。自以其身爲六四。括囊以免于咎譽。此聖人作易之至意。君子占易之正理。豈胸中漫无心易。臨危乞卦于鬼神乎。昔有問此爻于朱元晦者。元晦曰。凡得此爻。在位者便當去。未仕者便當隱。又問比于如何。曰。此別是一義。雖凶无咎。愚謂筮得此爻者。信當去矣。如筮不得此爻。不當去乎。似此士人。止靠著策爲

活焉知易比干之事明是不括囊何必爲之周旋殺身成仁誠无咎矣然終不得爲无譽比干遇害正爲不括囊而有譽孔子處春秋人目爲東家丘叔孫武叔輩毀之人不知不愠如乾初九遯世无悶確乎不拔此龍德而隱者乃爲无咎无譽易道之大豈在著策

象曰括囊无咎慎不害也

言能慎如此則可以无害

六五黃裳元吉

六五以陰居尊柔順得中不震矜炫耀而諂篤實之

光不先主自用而含溫文之度。故其象爲黃裳黃者
中央之地。色裳者下體之服。地象以此居位致用。則
章美時發。王事有終。无復括囊之虞。所謂積善餘慶
承乾配天。故曰元吉。此坤道之極盛。而代終之事畢
矣。

卦以五爲尊位。而易實非專爲有位言也。地上之五
亦非其尊。以內視外。內爲體而外爲用。五居上得中。
有位之象。是君子效用之時。而大小尊卑。未可一定。
卽如夫子仕无道而委吏乘田。得盡其職。可謂非黃
裳之吉乎。以地論。萬寶秋而美利均。亦是地之黃裳。

以君論繼體崇文而守成業亦是君之黃裳至于大臣如周公之盡忠王室赤舄几几正當坤之六五其相武王誅紂伐奄滅國五十以至制禮作樂則又黃裳之飛龍易何常之有聖人乘時御天動成象行成爻其次則因時順理知幾觀象玩占而已程正叔以黃裳元吉爲戒臣子不可居君位夫聖人何嘗專以五皆爲君位戒人臣居之拘矣朱元晦又引左傳南蒯將叛筮得此爻謂占者德如是則其占亦如是果爾三百八十四爻止可分言凶兩等凡吉者惟聖賢得占凶者盡與愚不肖豈得謂之易使聖人作易專

倚卜筮則易者。事鬼之書而已。聖人作易設教。非以
權予鬼也。

天數五。地數五。故乾坤二卦。唯五最盛。夫子五十以
學易。自謂无大過。蓋合乾坤之數。體天地之撰。易盡
于乾坤之二五矣。二上大過也。

象曰。黃裳元吉。文在中也。

坤爻純偶。六虛洞然。有在中之象。體本應乾。乾陽下
濟。映虛而光明。有文章之象。但其卦本陰。各爻位不
中正。二中正而在下。惟五柔中居尊。下與二應。二爲
體而五爲用。二道德而五文章。事業合內外之道也。

故爲元吉。在中之中有三義。有根心由中之義。又有居正建中之義。又有柔順得中之義。以直方之德。含章時發。根心之中也。當五之位。居上臨下。在位之中也。本承乾之德。動不爲先。无過之中也。凡象變動非一義類此。

文生于陽。陽不遇陰則不顯。燈不遇暗則无光。絳不雜織則不成彩。陰陽錯而後文生。故爻三言章。五言黃。二四无陽。則不言文章。坤承乾如月附日。全體皆陽光。故彖傳曰。含弘光大。文言曰。含萬物而化光。六二曰。地道光。光卽文也。

文在中皆釋黃義。不釋裳者。裳本地象。故大傳曰。垂衣裳而天下治。取諸乾坤。乾象衣。坤象裳。六爻皆裳也。但不盡黃耳。五圖書之中。中央色黃。六得五。陰麗陽位。故稱文。六二純陰。雖中不文。六三遇陽。雖文不中。

問六五黃裳。其占特爲元吉。何也。小人的然曰亡。皆躁擾之咎。君子之道。莫吉于順厚。莫凶于躁擾。中和者。道德性命之本。聖人作易。首乾坤。明一陰一陽之爲道。不可偏廢。而人者。陰陽之會。戴乾履坤。乾父坤母。天遠地近。故父尊而母親。體坤以法乾。體順以承。

健下學而上達也。順者百行之首。是以夫子天縱至德。惟曰溫良恭儉讓。曰申申夭夭。曰溫曰不猛。曰安。中庸論道曰闇然日章。溫而理簡而文。子路好剛。夫子憂之于其問士。曰切切惔惔怡怡如。故乾非聖人不能用。天下无无乾之坤。无无坤之乾。易首乾坤。其旨深矣。或曰爻辭文言稱正直剛方。何也。曰坤非偏柔。所謂牝馬之貞。承乾而爲柔也。偏柔則小人。故乾之九五。非无黃裳。龍亦陰象。君子不患不剛。而剛不能柔。則必傷。小人不患不柔。而柔以用剛。則必險。大抵剛以立德。柔以濟用。剛以操心。柔以制行。六五元

吉柔得中也。六二直方大。君子以脩德可也。黃裳。君子以致用可也。如是則乾道行矣。不然九五飛龍之事。可以嘗試乎。是在知易者自占而已。故夫子曰。五十以學易。可以无大過。嗚呼。乾坤之道。二五盡矣。二上過也。

上六龍戰于野。其血玄黃。象曰。龍戰于野。其道窮也。

乾盛于九五。故坤至六五。承乾之事畢。天數至五而上有七九。地數至六而上有八十。然乾止言亢而坤卽稱窮。乾上之象不過悔。而坤上之象至于戰且血。何其凶耶。蓋天地之數五爲中極。陽主于進。進常有

餘而過五則亢陰主于退退常不足而至五則終坤之五從乾而得也乾不過五而坤更求上乎以陰居陰是六六矣位數兩極所謂先迷失主與其類行陽氣已盡生意已彫積陰慘冽堅冰既至欲无戰懼得耶陰至于此獨用自先馬何能及其惟乾之龍與夫龍本陰物乘乾陽而極則亢于天乘坤陰而極必戰于地野地也見其血其色玄黃血陰質也玄黃馬色也詩曰我馬玄黃化而爲龍之血迷亂之象也龍已迷道失常精神雜亂塊然血肉无復變化之靈豈若牝馬之得主行地无疆也乎此坤所以貴于後順安

貞也。地變天。馬化龍。宇宙以來。未有此事。故曰道窮用六。利未貞。

此明陰爻用六之義。猶乾之用九也。爻位止六。陰數不止六。以六名陰何也。陰虛不足而戒于先位。六則數亦六。安常守順。陰之道也。故凡用陰之道。利于常永貞固。如牝馬行地无疆。以順承乾。是坤所宜也。所以止于六者。坤體三偶。偶三爲六。陰靜而止。故止于六。諸卦陰爻百九十二。皆坤。皆用六。故于此發之。而或者謂用六爲筮法之老陰。老則變而之乾。其說如用九之謬。旣變而爲乾。則其占當爲元亨利貞。何以

獨言利未貞使變之他卦安必皆利未貞乎或者謂
卽乾坤之變以例餘夫六十四變不同占何得以乾
坤例他卦也

卦位六而爻用九故陽爲无首卦位六而爻亦用六
故陰爲未貞其義甚明

象曰用六永貞以大終也

用六所以爲未貞者陰以陽終也陰小陽大故易謂
陽爲大陰爲小終卽三爻无成有終之終陰无成而
代陽終陽雖用九而位終于六則陰自當從陽而以
陽終所以未不失爲牝馬之貞也如退而歎于六之

內則不足以合陽。進而多于六之外。則非分失常。故曰以大終。承乾之義也是以上六无陽而陰自終。遂有龍戰之凶。陰不可離乾自終者。所謂牝馬之貞也。文言曰。坤至柔而動也剛。至靜而德方。後得主而有常。含萬物而化光。坤道其順乎。承天而時行。

此夫子申釋文王坤卦彖辭。以明坤非偏于柔順也。柔而无剛。則其順爲陰邪。坤以順乾爲德。非柔弱也。雖以靜爲體。非寂滅也。旣應乾而承天。乾健而坤不剛。何以應之。天行不息。而坤不動。何以承之。故彖傳云。利牝馬之貞。牝馬從牡也。柔而行。地動而剛也行。

地无疆。安貞不變。至靜而德方也。坤之剛不可見。于其動而生物。見之坤之方不可知。于其靜而不移。知之乾大而能承。非剛乎。品物各得。非方乎。陰由陽生。无乾則坤无專成。故能後乾得主。而有常不亂。卽彖先迷後得之謂也。柔而能剛。靜而能動。後主而有常。所以柔順貞固。能承乾之施。含受萬物。而變化光顯。成天之能。代天之終也。坤道其順乎。奉天而无時不與天偕行。乾不息。坤亦不息。始始生生。如坤可謂真能順者矣。

坤无剛。不可以爲順。亦猶陽无陰。不可以爲乾也。坤

无動不可以爲靜。亦猶龍无潛不可以爲飛也。故曰立天之道曰陰與陽。立地之道曰剛與柔。一陰一陽之謂道。萬事萬物之理。未有易此者。

乾道始于元。坤道終于貞。順者坤所以爲貞。貞者坤所以爲順。女從一則貞。順而不貞則爲陰邪。如履霜之冰。龍戰之血。不可以終。故文言剛方有常。承天時行。正以明彖。辭利牝馬貞之義。

乾陽體而用陰。所以始乎坤也。坤柔體而用剛。所以終乎乾也。乾以陰爲體則喪其陽。以陽自用則亢而悔。坤以剛爲體則失其坤。以柔自用則戰而血。小人

之殃。君父積柔也。頽順也。无剛方之德。而以陰柔自用。是背陽而自爲陰也。无此造化。无此人道。无此物理。

坤從乾以爲剛。則其剛爲順。離乾爲剛。適以自滅其陰。蓋无乾卽无坤。小人自用取亡。天之道也。六五黃中。剛柔中正。所以爲君子。上六龍戰。離乾自用。所以爲小人。

積善之家。必有餘慶。積不善之家。必有餘殃。臣弑其君。子弑其父。非一朝一夕之故。其所由來者漸矣。由辯之不早辯也。易曰。履霜。堅冰至。蓋言順也。

此申釋初六爻辭之義。因造化明人事。以戒順而不
貞者。蓋陰以順而承乾。亦以順而侵陽。如春夏承乾
而陽已浸消矣。秋冬陽消而漸始于夏也。于其承乾
也。謂之順于其消陽也。順也。乃所以爲侵也。順之極
則消之盡此。雖氣數盈虛必然。而爲陽計者何可不
早辯。爲陰計者何可遂亡陽。爲順計者何可因順以
爲侵。能辯乎此。則陽陰各安其常。而坤得全其爲牝
馬之貞矣。

夫易聖人憂患天下後世而作也。地之事天。坤之承
乾。可无俟聖人作易爲也。人者天地之會。乾坤之精。

君臣父子。人道之乾坤也。以地之所以事天者。事君以坤之所以承乾者。承父則順之至已然。天下之事造于逆者。易防而造于順者。難知。陰之侵陽也。順其消以自長也。順其虛以自盈也。陽日消日虛而不知。且曰吾偶也。夫非以其順之故與。亂臣賊子弑父與君篡位竊國。其術靡不由此。文王三分天下有二。以服事殷。故于坤之彖。發牝馬利貞。後順得常之義。夫子因申明亂臣賊子之禍。二聖人者。豈不憂患天下後世之遠乎。此坤初爻之大占也。

陽與陰不能相无。聖人獨于坤。發不祥之戒何也。夫

乾本元陽大極之體天道也知也而未成能也一偶
初分成坤則元陽之知已效之能能不失其知是謂
簡以從易坤順之貞也然一既破爲兩知既踐爲行
難保其不變而之他馴致其道卽自此始矣故一陰
生一陽損我之生者卽我之虧也此其始至微乾能
知始則陽常爲主消息盈虛由我而陰第承之苟乾
不知惟陰之順受其蝕而不覺豈知始作成之義是
存乎乾而已其于人也惻隱羞惡辭讓是非之心良
知也乾也效此四者于能而行仁義禮智之事良能
也坤也无所爲而良心自然者易也无所變而良能

自行者簡也。簡以從易者順也。順而不失其常者貞也。人皆有惻隱羞惡辭讓是非而多行不仁不義是以聖人責坤之不能承乾也。然良心之喪惟始于一念之差。而其流之濫。背天逆理。彼未嘗不自以爲順。由神明昏迷不察。自失其知始之道也。故孟子曰。凡有四端于我者。知皆擴而克之。知者早辯之謂也。又曰。若火之始然。泉之始達。順之謂也。火然泉達而之害。則順之正也。牝馬之貞也。火然泉達而之不害。則順之邪也。龍戰之血也。皆自初六始矣。故曰。蓋言順也。朱子改順爲愼。失其解矣。

人自壯至老自旦至夜密移而不知皆順之爲也坤陰用事乾知失主偶得朋而東北化爲陰方故迷失其道以致爲禽爲獸老死爲玄黃之血亦由不早辨皆順之過也坤順自主乾不察其來則往而不反故易彰往而察來數往者順知來者逆易逆數也此之謂也凡順不可不知其旨微矣

直其正也方其義也君子敬以直內義以方外敬義立而德不孤直方大不習无不利則不疑其所行也

此申言六二爻辭之義无枉之謂直直不以正則好遂而僻矣坤直以承天故曰正无闕之謂方方不以

義則割強而乖矣。坤方以生物。故曰義二者備。坤道所以爲大順。不習无不利也。其要不外人心。敬者所以直乎其內也。心有放佚。則神明渙散而中不直。敬則志專一而內直矣。義者所以方乎其外也。應務失宜。則履蹈錯亂而外不方。義則事有裁制而外方矣。敬立乎內。義立乎外。兩者夾持。精神自振。廓乎大公无私之心。浩乎常伸不撓之氣。心思可通天地。言動可服鬼神。金石可貫。蠻貊可行。而德不孤。大可知也。此直方大者。良能之本體。天德之自然。豈待習然後利。而何疑之有。蓋以坤承乾。始則終之。知則行之。不

容擬議不假安排。所謂牝馬之貞。豈有所擬而後行。故曰不習无不利。則不疑其所行也。苟不利而習。是行有疑也。有疑之行。邪枉之道。私知小慧。不可以生一物。不可以行一步。孤之至者。何足語坤。

道一而已。在天地爲易簡。在人爲良心。乾知而坤能。心知而行。能敬義者。心之精神。雖放佚之後。敬義一立。神氣自張。故曰不孤。我欲仁。斯仁至。何習何疑之有。坤之承乾如此。故曰易簡之善配至德。

乾四以陽居陰。坤三以陰居陽。皆曰或或。者疑之象。六二以陰居陰。得正而中。故其象不疑。

周易正義 卷三 三十六
陰雖有美舍之句以從王事弗敢成也地道也妻道也臣道也地道无成而代有終也

此申言六三爻辭之義陰无美陰之美皆陽之美也五氣運于天而後五材生于地天不施則地不能產君不令則臣不能行父不生則无子夫不娶則无妻其何能有成也舍乾之美從乾之事代爲之終焉而已從事无成代終所以爲舍美也有美不舍淺也舍美不肯從王吝也從王自居其成驕也皆不可以爲人臣

爻言舍章以時發爲其未從王也此言有美舍之是

雖從王亦不敢發也。蓋惟不敢發而後發以時。不舍
未有能時者。露才揚已。矜功伐能。是霜爲冰。馬爲龍
之漸。六四所戒也。故坤者。承乾而已也。

卦爻始一終六。乾始坤終之象。圖數天九地十。天成
地終之象。

天地變化。草木蕃。天地閉。賢人隱。易曰。括囊无咎无譽。
蓋言謹也。

此申言六四爻辭之義。六三處內卦之終。含章待時。
至四則變革之始。儻于此時。天地變化。陽氣開通。向
用可也。乃進遇重坤。陰氣堅錮。草木零落。天地閉塞。

所謂无道當隱之時。而六四身既出矣。且奈何。四本陰柔。又不當位。宜斂藏韜晦。深潛不露。使刑戮不及。名譽亦不隨。則謹之至。明哲自全之道也。後世若東漢黨錮之士。不括囊而取咎者也。西漢清名之士。括囊而不能无譽者也。此龔勝范滂輩所以皆不得免焉。後世括囊无咎者常有。而括囊无譽者鮮聞。凡括囊者。皆干譽者也。名之殺身也。甚于惡鳥乎。得免問陰爻偶而謂之閉。陽爻奇而謂之闢。何也。陰虛內光。故謂之閉。陽實外朗。故謂之闢。一常開。兩常閉。開主施。閉主受。往則開。來則閉也。

君子黃中通理。正位居體。美在其中而暢於四支。發於事業。美之至也。

此申言六五爻辭之義。六五以陰居陽。柔中而尊。所謂承乾之坤。牝馬之貞。得主之常。又下應六二直方大。所以黃中而美在也。柔順无疆。不習无不利。所以通暢而條理也。得位承乾。居中從王。所謂正位居體也。體卽中也。得中故能居體中。有美而暢于四支。發于事業。所謂含弘光大。品物咸亨。乾道之變化。无一不代天工。品物之文章。勤宣有終。故曰美之至。坤爲土位。中央色黃。六以陰得五陽氣冲和。故其象

爲黃中。土氣比合。四時五方。周流无滯。條理通達。故爲四肢百事宣暢發越之象。蓋地承天施。草木蕃庶。文章彪炳。坤道至是有終。所謂積善之餘慶此矣。百昌生于土。反于土。故坤爲歸藏。是謂中體。地之中體莫如六二。而爻辭歸五何也。五爲圖書之中。土德方隆。黃者中央純色。體卽中。居卽居此中也。黃中之君子。卽是直方之君子。敬義交脩。胸中靜虛洞朗。太和元氣周流貫徹。順理无礙。取之左右逢原。故曰黃中通理。三五同功。三坤體備未純。四與坤同體未中。故美舍括。至五通暢發揮。美斯其至。暢發反舍貞括。

囊爲象

乾卦中四爻皆有精明奮發之象。坤卦中四爻皆有收斂安靜之象。乾五飛龍風行雷動。發揚彪炳宣洩无餘。坤五黃中正位居體含。蓄其精以歸根復命。故乾五爲外王之業。坤五爲內聖之德。乾五聲應氣求。不思而得。知之至也。坤五和順通暢。不勉而中。行之至也。陰陽合而成至道。易簡配而成至德。乾坤二五所以爲天地聖人之能事。孔子願五十學易。可无大過與天地合德也。知至至之。知終終之。其斯之謂陰疑於陽。必戰爲其嫌於无陽也。故稱龍焉。猶未離其

類也。故稱血焉。夫玄黃者。天地之雜也。天玄而地黃。此申言上六爻辭之義。坤至五盛矣。天地之數五爲中。乾之六龍盛于九五。過五則亢。陰之牝馬盛于六五。以承乾也。乾過五不能无悔。坤欲過五得乎。蓋陽常有餘。龍以陰物乘陽而上。猶或可到。坤而居上。數位兩極。以陰乘陰。无主自先。是亦欲爲陽耳。夫陰之爲陰也。依陽爲之。陰之自爲也。復何依。專主獨行。疑陽非陽。疑則无主。而懼必戰。嫌猶疑也。陰必不可无陽。而疑于陽。故爻辭變牝馬稱龍。龍乾象。陰物也。而乘乾。是以陰乘陽。離其陰之類也。故神。今以坤用龍。

所謂西南之朋。與其類行。不得主而先。迷失道者也。安能變化稱神物乎。是故有暴鯁中野。見血之象。蓋乾龍之亢亢于天。猶神而能飛。坤龍之戰戰于野。膏血塗地矣。地欲升爲天。則必墮。馬本走求飛。則必僵。所以窮也。其曰玄黃者。何也。嫌疑之象。陰疑陽。地疑天。故曰玄黃。言雜也。天色玄而地色黃。其可雜也乎。○造化之理。陰陽互乘。不可相无。陰與陽相違甚遠。其極也。反相似。故人凍極反熱。疑而戰之象。小畜陰畜陽極。亦曰疑戰者。疑象說卦傳曰。戰乎乾。陰氣寒栗而戰。非相攻之謂。

天地間惟一陽之氣。生生不息。而消歇斂藏。不能不爲陰。如晝之必夜。生之必死。不可相无。聖人好生惡殺。貴德賤刑。故嘗貴陽賤陰。防其過而憂其漸。所以發履霜戰血之義。

坤爲馬。馬八尺以上曰龍。坤終稱龍。將變之象。變則成。剝故有血象。凡易象不拘一義。類此。

周易正解卷二終